



Republika e Kosovës  
Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS  
NEZAVISNI NADZORNI ODBOR CIVILNE SLUŽBE KOSOVA  
INDEPENDENT OVERSIGHT BOARD FOR THE CIVIL SERVICE OF KOSOVO



**Datë:** 26.02/2026  
**Numër Protokolli:** 1049/2026

**A.nr.69/2026**

**Këshilli i Pavarur Mbikëqyrës për Shërbimin Civil të Kosovës**—Kolegji për Shqyrtimin dhe Vendosjen e Ankesave, në përbërje nga: Arben Mehmeti-kryetar, Malsore Gashi Bajraktari dhe Eshref Shabani, anëtare, me Avdyl Bekteshi, në cilësinë e procesmbajtësit, në procedurën sipas ankesës me numër A.nr.69/2026, të datës 23.01.2026, të parashtruar nga ankuesja M.K, nga Prishtina, kundër organit të punësimit/Komunës së Obiliqit, në çështjen juridike “*kërkesë nga marrëdhënia e punës*”, duke vepruar në pajtim me nenin 6, paragrafin 1, nën paragrafin 1.1 dhe nenin 18, paragrafin 1, nën paragrafin 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës i ndryshuar dhe plotësuar me Ligjin Nr.08/L-180, si dhe në mbështetje të Rregullores Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, me datë 26.02.2026, mori këtë:

## V E N D I M

**Hedhet poshtë si e parakohshme** ankesa A.nr.69/2026, e datës 23.01.2026, e parashtruar nga ankuesja M.K.

### A r s y e t i m

Nëpunësja civile, M.K (*në tekstin e mëtejme referuar: Ankuesja*), me datë 23.01.2026 ka parashtruar ankesë në Këshillin e Pavarur Mbikëqyrës për Shërbimin Civil të Kosovës e cila është regjistruar nën shenjën A.nr.69/2026 dhe numër protokolli:358/2026, kundër heshtjes administrative të organit të punësimit/Kryetarit të Komunës, Drejtorisë për Shëndetësi dhe Mirëqenie Sociale si dhe Njesisë së Burimeve Njerëzore të Komunës së Obiliqit, në kërkesën e saj të datës 18.12.2025.

Këshilli i Pavarur Mbikëqyrës për Shërbimin Civil të Kosovës (*tutje referuar Kolegji i Këshillit*) bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, me datë 29.01.2026 ka proceduar kërkesën për përgjigje në ankesë te Komuna e Obiliqit, ndërsa kjo e fundit më datë 24.02.2026 ka dërguar përgjigjen në ankesë se bashku me shkresat e bashkangjitura të lëndës.

**Kolegji për Shqyrtimin dhe Vendosjen e Ankesave (në tekstin e mëtejme referuar: Kolegji i Këshillit) administroi këto prova:** Ankesa me numër protokolli 358/2026 të datës 23.01.2026, e parashtruar nga ankuesi në Këshillin e Pavarur Mbikëqyrës për Shërbimin Civil të Kosovës; Kopjen e ID-së së ankueses; Vendimin e datës 27.08.2025 të Kryetarit të Komunës; Akt Emërimit të ankueses të datës 01.09.2025; Formularin e datës 18.12.2025; Kërkesa e datës 18.12.2025; Kërkesën për përgjigje në ankesë e datës 29.01.2026.

Kolegji i Këshillit, pas shqyrtimit të gjitha shkresave të lëndës të parashtruara nga palët në procedurë, ka konstatuar se ankesa e ankueses, **është e parakohshme, sepse:**

Nga administrimi i shkresave të lëndës të ofruara nga palët në procedurë, Kolegji i Këshillit konstatoi se ankuesja, përmes Vendimit të datës 27.08.2025 të Kryetarit të Komunës së Obiliqit, është transferuar në mënyrë të përhershme për interes të institucionit, nga pozita “Zyrtare për Shërbime Sociale” në pozitën “Zyrtare e Lartë për Shërbime Sociale”, të cilës edhe i është lëshuar Akti i Emërimit me datë 28.08.2025 duke e emëruar në pozitën “Zyrtare e Lartë për Shërbime Sociale”-Profesional 1, në kuadër të Drejtorisë për Shëndetësi dhe Mirëqenie Sociale të Komunës së Obiliqit.

Ankuesja, me datë 18.12.2025 i është drejtuar organit të punësimit, respektivisht me kërkesën në fjalë i është drejtuar Kryetarit të Komunës, Drejtorisë për Shëndetësi dhe Mirëqenie Sociale si dhe Njësisë së Burimeve Njerëzore të Komunës së Obiliqit, që e njëjta të përfshihet në kuadër të SIMBNJ-së dhe listës së pagave në kuadër të kategorisë Profesional 1 sipas akt të emërimit, me arsyetimin se është e diskriminuar me kolegët e tjerë të zyrës, të cilët për punën e njëjtë gëzojnë pagë më të lartë.

Kundër heshtjes administrative të organit të punësimit, ankuesi me datë 23.12.2025 ka parashtruar ankesë në Këshill me pretendimin ankimor se e njëjta është duke u dëmtuar financiarisht, pasi që pavarësisht faktit se organi i punësimit ia ka lëshuar Aktin e Emërimit me kategorinë Profesional 1, e njëjta nuk është duke u kompensuar sipas koeficientit të ri, më kërkesën që organi i punësimit të zbatoj aktin e emërimit të datës 28.08.2025.

Kolegji i Këshillit lidhur me pranueshmërinë e ankesës së ankueses, ka analizuar dispozitat ligjore të Ligjit Nr.05/L-031 për Procedurën e Përgjithshme Administrative, gjegjësisht nenin 98 paragrafin 1 dhe 2, ku përcaktohet se: *1. Procedura administrative nisur sipas kërkesës, do të përfundojë sa më shpejt që të jetë e mundur, por jo më vonë se sa afati i përcaktuar me ligj të veçantë për atë lloj procedure. 2. Në rast se ligji i veçantë nuk ka paraparë një afat, siç është paraparë në paragrafin 1 të këtij neni, afati i përgjithshëm i zbatueshëm për përfundimin e procedurës administrative është dyzetepesë (45) ditë nga fillimi i saj*, si dhe nenin 127 paragrafi 1 dhe 4 i të njëjtët ligj ku përcaktohet se: *“1. Ankesa duhet të parashtrohet brenda tridhjetë (30) ditëve nga data kur pala është njoftuar për aktin administrativ. 4. Ankesa kundrejt heshtjes administrative mund të parashtrohet jo më herët se shtatë (7) ditë dhe jo më vonë se dy (2) muaj pas skadimit të afatit për njoftimin e aktit administrativ.*

Ndërlidhur me këtë, Kolegji i Këshillit në bazë të shkresave të lëndës si dhe konstatimeve të dhëna si më lartë në arsyetimin e këtij vendimi, konstaton se ankesa e ankueses e datës 23.01.2026 e parashtruar në Këshillin e Pavarur Mbikëqyrës për Shërbimin Civil të Kosovës është e paraafatshme, ngase e njëjta është parashtruar në kundërshtim me nenin 127 paragrafi 4 të Ligjit Nr.05/L-031 për Procedurën e Përgjithshme Administrative, pasi që institucioni punëdhënës lidhur me kërkesën e ankueses të datës 18.12.2025 ende nuk kishte vendosur apo nuk ka nxjerrë akt administrativ përpara se ankuesja të parashtrojë ankesë në Këshill, sikurse që nuk është përmbushur as kriteri kohor ndërlidhur me heshtjen administrative, pasi që institucioni punëdhënës sipas dispozitave të lartcekura ligjore ka afat kohor prej dyzet e pesë (45) ditësh, për trajtimin e kërkesës së ankueses të datës 18.12.2025, ndërsa ankuesja ankesën në Këshill e ka parashtruar me datë 23.01.2026 apo në ditën e tridhjetë e shtatë (37) pas parashtrimit të ankesës në institucion punëdhënës, nga rrjedh se ankuesja nuk e ka respektuar apo prit përmbushjen e parakushtit ligjor të afatit kohor “**jo më herët se shtatë ditë (7) pas skadimit të afatit për njoftimin e aktit administrativ**”, nga rrjedh se ankuesja përveç kalimit të dyzet e pesë (45) ditëshit, është dashur të pres edhe shtatë (7) ditë të tjera, për të hyrë në heshtjen administrative sipas përkufizimeve ligjore të dispozitave të LPPA-së, nga rrjedh se ankuesi është dashur të pres afatin e kalimit prej 52 ditësh, duke filluar nga data 18.12.2025, e pastaj nëse pas kalimit të këtij afati kohor institucioni nuk vendos lidhur me kërkesën e tij të datës 18.12.2025, atëherë të njëjtes i lind e drejta e parashtrimit të ankesës kundër heshtjes administrative nga organi i punësimit sikurse përcaktohet me dispozitat e nenit 127 paragrafi 4 të LPPA-së.

Andaj, Kolegji i Këshillit, nga të gjeturat e dhëna si më lartë, konstaton se ankesa e ankuesit e parashtruar në Këshillin e Pavarur Mbikëqyrës për Shërbimin Civil të Kosovës me datë 23.01.2026 është parashtruar në kundërshtim me nenin 127 paragrafi 4 të Ligjit Nr.05/L-031 për Procedurën e Përgjithshme Administrative, andaj është hedhur poshtë si e palejuar si në dispozitiv të këtij vendimi pasi që nuk e plotëson kushtin e nevojshëm të pranueshmërisë së ankesës në kuptim të nenit 129 paragrafi 1 nën paragrafi 1.3 të Nr.05/L-031 për Procedurën e Përgjithshme Administrative ku përcaktohet se: *“Ankesa është e pranueshme nëse i plotëson këto kushte: 1.3. ajo është parashtruar brenda afatit të parashikuar nga neni 127 i këtij ligji.”*

Andaj, pas analizimit dhe vlerësimit të të gjitha shkresave të lëndës si dhe duke u bazuar në nenin 6 paragrafi 1, nën paragrafi 1.1 dhe nenin 18 paragrafi 1 nën paragrafi 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës i ndryshuar dhe plotësuar me Ligjin Nr.08/L-180, Kolegji vendosi si në dispozitiv të këtij Vendimi.

Ky vendimi hyn në fuqi ditën e nënshkrimit nga Kryetari i Kolegjit.

**Këshillë juridike:** Pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

**KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS**  
**Lënda, A.nr.69/2025, datë 26/02/2026**

**Avdyl BEKTESHI**

\_\_\_\_\_  
**Procesmbajtës**

**Arben MEHMETI**

\_\_\_\_\_  
**Kryetar i Kolegjit**

**Vendimi i dorëzohet:**

- Ankueses M.K
- Komunës së Obiliqit (Udhëheqësit të Burimeve Njerëzore), si dhe
- Arkivit të KPMSHCK-së.